

clusit. Promissiones illæ gratiæ toti cœtui factæ sunt, qvæ si ad induratos non pertinerent, mendax Deus & hypocrita dicendus foret. Sed ego potius eos mendaces arbitror, qvi Deum induratis verba dare fingunt, qvasi Verbo quidem suo induratos promissâ gratiâ ad pœnitentiam invitaret, sed tamen nollet, induratos sibi hanc promissionem applicare. *Damasceni* autem locus in eadem thesi allegatus non distinguit inter desertionem impiorum partialem & totalem ; sed inter desertionem piorum & impiorum. Unde *Pelargus* in notis ad Damascenum prioris desertionis exempla ponit Christum & Davidem, posterioris Saulem & Pharaonem. Præterea etiam impios Damascenus non ita à Deo deserit dicit, ut omni gratia priventur, sed propria malitia eos perire affirmat, Deo omnia, qvæ ad salutem eorum faciunt, faciente.

Thesis XIV.

Qvæ in thesi 33. ad objectionem ab efficacia verbi divini depromptam respondentur, alibi in der Vertheidigung p. 46. jam discussa sunt. Nec melioris notæ sunt, qvæ ad objectionem à gratia assistente defumtam regeruntur & ex iis , qvæ haetenus dicta sunt, haud difficulter difflari possunt. Testimonia denique Theologorum nostratium disputationi de statu Induratorum passim inspersa, pleraque auctorem nihil juvant. Nonnulla ipsi adversantur, quale est *Johannis Schmidii*, cuius loco *Baldinus* nominari debuisset ex Comment. in Zachar. Cap. VII. adductum